

佛說五十頌聖般若波羅蜜經

宋西天譯經三藏朝散大夫試鴻臚卿傳教大師普賢奉詔譯

如是我聞一時佛在王舍城鷲峯山中與大
苾芻衆千二百五十人俱皆得阿羅漢諸漏
已盡無復煩惱心善解脫通達智慧如大龍
王斷諸有結去除重擔所作已辦逮得已利
心得自在爾時佛告尊者須菩提若有善男
子善女人及諸聲聞緣覺愛樂修學無上菩
提者汝等之人於此般若波羅蜜經聽受讀
誦分別演說速獲正覺須菩提此般若波羅

蜜經具足方便通達一切諸佛菩薩甚深法
藏應如是學如是修行須菩提若有菩薩摩
訶薩於此般若波羅蜜經隨喜聽聞受持讀
誦應如是學如是修行何以故此經廣說一
切諸佛菩薩阿耨多羅三藐三菩提甚深法
藏須菩提又此般若波羅蜜經所有聲聞法
緣覺法菩薩法菩提分法及一切諸佛一切
般若波羅蜜法聚集攝受平等如一爾時須
菩提白佛言世尊云何所有聲聞法緣覺法
菩薩法菩提分法及一切諸佛一切般若波

羅蜜法聚集攝受平等如一佛告須菩提所
有布施波羅蜜持戒波羅蜜忍辱波羅蜜精
進波羅蜜禪定波羅蜜智慧波羅蜜內空外
空內外空大空勝義空有爲空無爲空無變
異空無相空自相空有際空無際空性空本
性空無性空自性空無性自性空一切法空
四念處四正斷四神足五根五力七覺支八
聖道四聖諦四無色八解脫九分法空解脫
門無相解脫門無願解脫門一切三摩地總
持門四智五通一切如來十力四無所畏大

七

十二

慈大悲十八不共法須陀洹果斯陀含果阿
那含果阿羅漢果緣覺果菩薩一切道智如
是一切善法一切般若波羅蜜悉皆聚集平
等攝受如一無異爾時須菩提聞佛所說白
世尊言今此經典聚集攝受一切善法一切
般若波羅蜜多平等如一甚深微妙意趣深
遠難解難知佛言須菩提如是如是如汝所
說須菩提若有不種善根諸惡朋友鈍根懈
怠無智愚癡少解少聞初學淺識及樂小乘
智慧狹劣者於此般若波羅蜜經難解難入

而不信受汝等當知復次須菩提若有善男

子善女人於此般若波羅蜜經隨喜聽受讀

誦演說如持過去未來現在諸佛不久速成

阿耨多羅三藐三菩提佛說是經已尊者須

菩提及諸菩薩天人阿脩羅等聞佛所說皆

大歡喜信受奉行

第七

十三

佛說五十頌聖般若波羅蜜經

大乘八大曼拏羅經

宋西天譯經三藏朝散大夫試光祿卿明教大師法賢奉詔譯

如是我聞一時佛在補陀落迦山聖觀自在
菩薩宮中有無數百千俱胝那由他菩薩恭
敬圍遶爾時會中有一菩薩名寶藏月光即
從座起偏袒右肩右膝著地合掌向佛而白
佛言世尊如來應供正等覺今有所問願佛
慈愍斷我疑惑爾時世尊告寶藏月光菩薩
摩訶薩言汝今問我樂聞之法是義云何當
為汝說時寶藏月光菩薩摩訶薩聞佛語已